

# SÎRÎRÎ KAARETA ITAKON ITE'KA PE PAULO NÎMENUKA'PÎ TESSALÔNICA PONKON PIA

Tessalônica ponkon pia kaareta menuka'pî Pauloya itakon ite'ka. E'mai'non yapi'sa' tîuya'nîkon tîpo, morî pe epu'tî to'ya pra awanî'pî. Î' kai'ma Jesus iipî epu'tî tîuya'nîkon pra awanî ye'nen, to' esi'nîpî'pî. —Aasîrî Jesus ii'sa' man —kai'ma to' esenumenka'pî.

Mîrîrî ye'nen inî' panpî' Pauloya menuka'pî, morî panpî' epu'to'pe to'ya. Aasîrî Jesus ii'sa' pra awanî'pî. Maasa aaipî pra tîise, imakui'sanya imakui'pî kupî inî' panpî'. Moropai Jesus iipî ya, inkamoro taruma'tîiya mararî pra, to' tîma'tanî'se.

Mîrîrî ye'nen Pauloya innape Jesus ku'nenan yeurîma see warantî: —Morî pe ako'mantî, eepîremakon pî' ako'mantî. Moropai Paapaya amîrî'nîkon ko'mannîpî morî pe, imakui'pî kupîya'nîkon namai.

**1** <sup>1</sup>Uurî Pauloya sîrîrî kaareta menuka, Silas moropai Timóteo pokon pe tîise uupia. Uyonpayamî', aapia'nîkon Tessalônica cidaderî ponkon pia imenukauya. Amîrî'nîkon wanî Paapa, uyunkon pemonkono pe moropai Uyepotorîkon Jesus Cristo pemonkono pe.

<sup>2</sup>Amîrî'nîkon repa to'ya yu'se anna man morî pe tîwe'to'kon ke moropai tîwanmîra tîwe'to'kon ke.

## Awe'taruma'tîto'kon Wenai Morî Pe Aako'mamîkon Kupî Sîrîrî

<sup>3</sup>Uyonpayamî', awenai'nîkon Paapa yapurî annaya sîrîrî tîwîrî. Sîrîrî kupî pî' anna man maasa pra ayeserukon era'ma annaya wenai, inî' panpî' innape ikupî pî' aako'mamîkon ye'nen, moropai aawarîrî'nîkon tiaronkon sa'namaya'nîkon ye'nen. Mîrîrî ye'nen —Morî pe man —taa annaya Paapa pî'. <sup>4</sup>Mîrîrî ye'nen apî'nîkon anna eseurîma sîrîrî anna wakîri pe pu'kuru Paapa yapurînenan pî' soosikon kaisarî. Anna eseurîma amîrî'nîkon pî' maasa pra tamî'nawîrî apona'nîkon tui'sen yapîtanîpîya'nîkon ye'nen. Amoronkon epu'to'ya'nîkon moropai kure'ne awe'taruma'tîto'kon kore'ta innape ikupîya'nîkon ye'nen. Mîrîrî pî' anna wakîri pe anna eseurîma.

<sup>5</sup>See warantí eseputí yairí Paapa waní. Apí'níkon Paapa, uyesa'konya taa: —Í' pe pra rí awaníkon pepín. Ewontí taríwaya upata ya' —taiya. Mírírí ton pe awe'taruma'tíkon sírírí. <sup>6</sup>Yairí Paapa waní maasa pra manni'kan amírí'níkon taruma'títíponkon taruma'tíiya kupí sírírí. <sup>7,8</sup>Tíise amírí'níkon erí'ka'to' ton tíríiya kupí sírírí. Moropai anna erí'ka'to' ton nírí tíríiya anna e'taruma'tító' winípai. Mírírí kupíiya kupí sírírí í' pensa ka' poi Uyepotoríkon Jesus Cristo iipí yai típemonkonoyamí' inseríyamí' meruntíkon pokonpe. Mírírí yai apo' kure'nan enepíiya kupí sírírí tarakkírí manni'kan innape Paapa ku'nenan pepín taruma'tíi. Moropai Uyepotoríkon Jesus maimu yawírí pra tíiko'mansenon taruma'tíi aaipí. <sup>9</sup>Inkamoro e'taruma'tí kupí sírírí mararí pra tínkupí'píkon imakui'pí yepe'pí pe. Moropai inkamoro waní aminke Uyepotoríkon pí', morí, meruntí piapai aminke to' ko'mamí ipatíkarí tíwe'taruma'tíkon pí'. <sup>10</sup>Mírírí kupí Paapaya pe man manni' tinekaremekí'pí weiyu yai, típemonkonoyamí', innape tíku'nenanya tapurító'pe Jesus iipí yai. Mírírí yai kure'ne to' esenumenka ipí' taatausinpai. Amírí'níkonya nírí yapurí mírírí inkamoro pokonpe, maasa pra innape itekare anna nekaremekí'pí ku'sa'ya'níkon wenai.

<sup>11</sup>Mírírí ye'nen anna epírema sírírí amírí'níkon pona. Esatí annaya Paapa pí', manni' Paapa amírí'níkon yannotípon típia aako'mamíkonpa. Morí pe amírí'níkon kupíiya aapia'níkon títírí yapisíkonpa kai'ma esatí annaya. Innape Jesus kupíya'níkon ye'nen, tamí'nawíron morí anku'pai awaníkon. Mírírí ye'nen ameruntíríkon ton títo'pe Paapaya esatí annaya mírírí kupíkonpa. <sup>12</sup>Mírírí warantí tamí'nawíronkonya Uyepotoríkon Jesus yapurí morí ankupíkon wenai. Moropai ayapuríkon to'ya nírí ipíkku pe akupí'píkon míkíríya wenai. Maasa pra Paapaya moropai Uyepotoríkon Jesus Cristoya amírí'níkon repa'pí morí ke.

### Paapa Yeyaton Pe Tíwe'sen

**2** <sup>1</sup>Mírírí ye'nen, uyonpayamí', í' kai'ma Uyepotoríkon Jesus Cristo ii'to' weiyu ekareme'nen menukauya sírírí. Moropai í' kai'ma iipia epere'ní kupí ekaremekíuya sírírí apí'níkon. <sup>2</sup>Maasa pra teesenku'tíi awaníkon yu'se pra anna man, moropai teesi'ní'se awaníkon yu'se pra anna man. Tiaronkonya taa apí'níkon: —Aasírí Uyepotoríkon weiyu erepansa' man. Mírírí ekaremekí'pí itekare ekareme'nenya —taa to'ya. Moropai tiaronya ekaremekí'pí, Pauloya ekaremekí'pí, taa to'ya ye'nen. Innape kí'ku'tí mírírí itekare. <sup>3</sup>Tíise inkamoro ye'kakonya ayenku'tító'kon pí' teesenku'tíi awaníkon e'pai pra man. Maasa pra Uyepotoríkon ii'to' weiyu eseporí rawírí, tu'kankon pemonkonyamí' waní pe man Paapa yewanmírínenan pe. Maasa pra imaimu yawírí tíwe'sanon pe pra to' waní. Moropai tiwin pemonkon iipí pe man, Paapa yeyaton pe tíwe'sen. Tíise maasa míkírí tí'ka Paapaya pe man. <sup>4</sup>Míkíríya tamí'nawíronkon napurí yewanmírí. Moropai inkamoro yentai tíwaní kai'ma esenumenka. Míkírí waní kupí sírírí

Paapa pe e'pai tamî'nawîron yentai. Paapa pe tîwanîpa kai'ma eereuta kupî sîrîrî Paapa soosirî ta ipata'se' ya', tamî'nawîronkon esa' pe tîwanîpa kai'ma. Mîîkîrîya taa kupî sîrîrî: —Uurî Paapa —taiya kupî sîrîrî.

<sup>5</sup>Mîrîrî pî' awenpenatakon pra naatî? Sîrîrî ekaremekî'pîuya pena akore'ta'nîkon wanî yai apî'nîkon. <sup>6</sup>Mîîkîrî pemonkon erepamî akore'ta'nîkon ma'nîpanen moro man. Mîrîrî ye'nen eeseporî pra aako'mamî. Moropai anî' pe awanî epu'tî pî' naatîi. Tîise mîîkîrî esenpo pe man teesenpoto' pata'pî weiyu yai, eesenpo pe man. <sup>7</sup>Tîise aasîrî Makui esenyaka'ma ko'mannîpî sîrîrî. Pemonkonyamî'ya Paapa maimu yewanmîrî emapu'tî pî' aako'mamî ama' pe, anî'ya epu'tî pra. Tîise mîîkîrî ima'napa pî' tîiko'mansenya ima'napa ko'mannîpî sîrîrî, Paapaya tîmo'ka pîkîrî. <sup>8</sup>Mîrîrî tîpo Paapaya imo'kasa' pata'pî ya, mîîkîrî pemonkon, Paapa yeyaton esenpo pe man. Moropai mîîkîrî pemonkon esenposa' tîpo, Uyepotorîkon Jesus iipî. Mîrîrî yai iwîiya pe man tîmaimu ke. Tamî'nawîrî morî pe tîwe'to' ke tiwinarî ima'tanîpîiya pe man. <sup>9</sup>Mîîkîrî pemonkon Paapa yeyaton iipî pe man Makui meruntîri yarakkîrî. Moropai mîîkîrîya tu'kan tera'masen pepîn kupî kupî sîrîrî. Ikupî eserîkan pepîn kupîiya kupî sîrîrî moropai esenumenkanto' kupîiya kupî sîrîrî, pemonkonyamî' yenku'tî ye'ka pe. <sup>10</sup>Mîrîrî kupîiya kupî sîrîrî pemonkonyamî' ata'ka'ma'san yenku'tîpa kai'ma imakui'pî pe. Inkamoro esenku'tî maasa pra yairon maimu anetapai pra tîwe'sa'kon wenai. Mîrîrî ye'nen inkamoro pîika'tî Paapaya pepîn. <sup>11</sup>Moropai mîrîrî wenai Paapaya ikupî kupî sîrîrî inkamoro seru'ye'kon maimu pî' inna taato'pe to'ya. <sup>12</sup>Mîrîrî kupîiya inkamoro taruma'tîpa, maasa pra yairon pî' inna taasa' to'ya pra awanî ye'nen, moropai imakui'pî yapurî pî' to' ko'mansa' ye'nen.

### Yairon Yekare Yawîrî Ako'mantî.

<sup>13</sup>Uyonpayamî', Paapa nîsa'nama'san, —Morî pe man —taa annaya Paapa pî' tîwîrî awenai'nîkon. Maasa pra amîrî'nîkon menka'pî Paapaya e'mai' pe awe'pîika'tîkonpa. Morî Yekaton Wannîya Paapa ton pe amo'ka'pîkon wenai moropai innape yairon ku'sa'ya'nîkon wenai, apîika'tîiya'nîkon. <sup>14</sup>Paapaya amîrî'nîkon yanno'pî anna nekaremekî'pî itekare wenai, Uyepotorîkon Jesus Cristo yarakkîrî ipîkku pe awanîkonpa. <sup>15</sup>Mîrîrî ye'nen uyonpayamî', mîrîrî aneta'pîkon yairon yawîrî ako'mantî. Mîrîrî eta'pîya'nîkon anna nekaremekî'pî wenai moropai anna nîmenuka'pî wenai. Mîrîrî yawîrî ako'mantî.

<sup>16</sup>Esatî annaya sîrîrî Uyepotorîkon Jesus Cristo pî', moropai Uyunkon Paapa pî'. Manni' uurî'nîkon sa'namatîpon, morî pe awe'to' wenai. Moropai tîwinîpainon tui'sen nîmîkî pî' ko'mannî emapu'tînen, manni' pî' esatî annaya. <sup>17</sup>Aatausinpatokon ton, ameruntîrikon ton tîto'pe to'ya morî kupî pî' aako'mamîkonpa. Moropai morî pî' eeseurîmakonpa esatî annaya sîrîrî.

**Tîpona To' Epîremato'pe Esatî Pauloya.**

**3** <sup>1</sup>Mîrîrî ye'nen uyonpayamî', anna pona epîrematî itekare anna nekaremekî'pî etato'pe pemonkonyamî'ya, moropai yapi'to'pe to'ya î' kai'ma amîrî'nîkonya yapisî'pî warantî. <sup>2</sup>Moropai epîrematî imakui'san pemonkonyamî' winîpai Paapaya anna pîika'tîto'pe. Maasa pra tamî'nawîronkonya innape itekare ikupî pepîn. <sup>3</sup>Tîise Uyepotorîkon ko'mamî yairî. Mîîkîrîya î' ta'pî tîuya yawîrî ikupî. Amîrî'nîkon kupîiya meruntî ke awanîkonpa. Moropai amîrî'nîkon ko'mannîpiiya morî pe Makui piapai. <sup>4</sup>Anna nekaremekî'pî yawîrî aako'mamîkon mîrîrî. Moropai mîrîrî warantî ikupî pî' aako'mamîkon maasa pra Uyepotorîkonya ikupî epu'tî pî' anna man. <sup>5</sup>Moropai Uyepotorîkonya apîika'tîkon yu'se anna wanî yapurîkonpa, moropai tamî'nawîron tui'sen yapîtanîpîkonpa Cristoya yapîtanîpî'pî warantî. Mîrîrî kupî Uyepotorîkonya yu'se anna man.

**Enya'ne Pe Tîwe'sen Pî' Eeseurîma.**

<sup>6</sup>Uyonpayamî', Uyepotorî Jesus Cristo maimu pe taa annaya sîrîrî apî'nîkon. Uyonpakon enya'ne'kon piapai atarimatî. Maasa pra inkamoro enya'ne'kon wanî î' kai'ma ayenupa'pîkon annaya yawîrî pra, iko'manpai to' wanî. <sup>7</sup>Maasa pra amîrî'nîkonya epu'tî morî pe î' kai'ma akore'ta'nîkon anna ko'mamî'pî yeseru. Mîrîrî kupîya'nîkon e'pai awanî. Maasa pra anna ko'mansa' pra man akore'ta'nîkon enya'ne'kon warantî. Moo teesenyaka'mai pra, anna ko'mamî pra awanî'pî. Mîrîrî epu'tî pî' naatî. <sup>8</sup>Î' esatî pî' anna ko'mansa' pra man anî'kan pî' epe'mîra. Tîise anna esenyaka'ma'pî moropai anna eke'nepamî'pî anna esenyaka'ma ke. Anna emî'pamî pra wei moropai ewaron kaisarî anna esenyaka'ma'pî anî' pî' anna yekkari ton esatî annaya namai. <sup>9</sup>Inna seru' pepîn. Anna yekkari ton esatî annaya e'painon apî'nîkon tîise esatî annaya pîn. Maasa pra sîrîrî anna yeseru warantî ikupîya'nîkon yu'se anna wanî. <sup>10</sup>Akore'ta'nîkon anna wanî yai, ankupîkon ton kupî'pî annaya ikupîkonpa. Anî' wanî ya, teesenyaka'mai pra iko'manpai, mîîkîrîya tekkari yonpa pepîn e'pai awanî.

<sup>11</sup>Sîrîrî pî' anna eseurîma sîrîrî maasa pra akore'ta'nîkon inkamoro ye'kakon enya'ne'kon warantî tîwe'sanon wanî yekare etasa' annaya ye'nen. Î' tîkonekai pra iko'manpai to' wanî tîise tiaronkon ko'manto' pî' to' eseurîmapîti ko'mannîpî. <sup>12</sup>Inkamoro pî' taa annaya sîrîrî, mîrîrî kupî to'ya namai. Uyepotorîkon Jesus Cristo maimu pe taa annaya sîrîrî. Tîise morî pe to' ko'manto'pe tiaronkon pokonpe teesenyaka'makon pî', to' ko'manto'pe teesenyaka'mai neken tekkarikon eporî to'ya. <sup>13</sup>Tîise amîrî'nîkon uyonpayamî', Paapa maimu yawîrî morî kupî pî' ako'mantî teeseta'kai pra.

<sup>14</sup>Yai pra moro awanî akore'ta'nîkon tîwe'sen mîîkîrî wanî ta'pî annaya yawîrî pra iko'manpai. Mîîkîrî era'matî morî pe î' kai'ma iteseru wanî.

Moropai yairî pra awanî ya, iipiapai atarimatî, mîrîrî teseru wenai aweppe'to'pe. <sup>15</sup>Tîise mîîkîrî kî'ku'tî ayeyatonkon pe, tîise ipanamatî. Ayonpakon panamaya'nîkon warantî ipanamatî.

**Paulo Esekaremekî**

<sup>16</sup>Mîîkîrî Paapa, tîwanmîn esa'ya tîwanmîn tîrî yu'se wai aapia'nîkon. Apona'nîkon tui'sen tamî'nawîron erepamî tanne, tîwîrî rî tîrîiya yu'se wai. Moropai aapia'nîkon Uyepotorîkon ko'mamî yu'se wai.

<sup>17</sup>Sîrîrî warantî uyenya ke imenukaya sîrîrî. Tauya apî'nîkon, umaimu man aapia'nîkon. Sîrîrî warantî imenukanen uurî tamî'nawîron ukaaretarî pî'. Sîrîrî umaimu menukaya, uurîya innape imenukasa' epu'tîkonpa.

<sup>18</sup>Morî pe Uyepotorîkon Jesus Cristo e'to' wanî aapia'nîkon yu'se wai. Mîrîrî neken.